

Tito

Jachuayama

1 ¹Atše Pablo, Bëngbe Bëtsabe oservená sëndmëna y Jesucristbe ichmoná entsànga jábuayenama, chë Bëngbe Bëtsá chabe entsànga chamotsemnana tojábacacanga, Jesucristbeñe chamotsošbuáchema y chë ndegombre soyëngama chamotsetatsëmbuama; chë soyënga endmëna ntšamo bënga, Bëngbe Bëtsabe básenga bëtsemnana, mondoyena jtsamëse. ²Lempe chca sëndama, er Bëngbe Bëtsábeñe jtsošbuáchiyëse, atše sentsobátmana chë nyetsca tescama yomna tšabe vida jtsebonnana. Bëngbe Bëtsá, chë ndocna te obosterayá, quem luare cabá ndmëna orscana tojanašebuachená entsànga chca vida jtsebonnana; ³y nya chama tempo tojóshjango ora, chë entsànga jábuayenama, soyëngaca Bëngbe Bëtsá chabe palabra šojinjanjé, ndayá Jesucristo entsàngbiana yochjanmama; y chca jábuayenama atše palabra šmonjabonyé, Bëngbe Bëtsá, bëngbe Atsebacayabe mândoca. ⁴Tito, quem tsbuanácha cbontsabobiamná. Atše Jesucristbe soyëngama entsànga sënjanabuayiná ora, aca chábeñe consanošbuaché y nyets útata cachca ošbuáchiyana Jesucristbeñe bondbomna, y chca, aca mo atšbe ndegombre uaqiñacá condmëna. Atše séntseimpadana,

Bëngbe Bëtsá Bëngbe Taitá y Jesucristo Bëngbe Atsebacayá, ácebeñe tšabe bendicionënga chaotsemnana chata chaboma, y chaboma aca ainaniñe tšabe ebionana chacotsebonnana.

Titbe trabajo Creta luaroca

⁵Atše Creta luaroca tcbonjëftsanboshjona, ntšamo chentše jamama enjetsashbencá chacomama, y nyetsca pueblënguenache chë ošbuachiyëngcá enefjuanëngbeñe bëtsëjemëngcá amëndayënga jtsemnana chacubuáyanama, ntšamo tcbonjftsemandacá. ⁶Canya bëtsëjemama uabuayaná mëntšá bontsemna: chaotsiyena ntšamo chabiana ndocná chaondétsichamo ndoñe tšabá yontsama ca; nye canye shembásabe boyá; chabe básengna, Jesucristbeñe ošbuáchiyënga chamotsemnana, y chamotsiyena, ntšamo ndocná chaodayana chënga nye jenomándama ntsobercá y nye ntšamo tmojtsebošcá imojtsiyena ca, o chënga chëngbe bëtsétsanga o mândayënga ndoñe montsayaunana ca. ⁷Er cánjëntse ošbuachiyëngcá enefjuanëngbe mandayá, Bëngbe Bëtsabe trabajo jamama tmojabonyéyeca, cha bontsemna jtсийenana, ntšamo ndocná chaodayana cha ndoñe tšabá yontsama ca; ntjajuaboycá, nye ntšamo cha tojtsebošcá ndoñe chaondétsama;

ndoñe chaondétsiyena nÿe rábiaca jtsemnama; ndoñe chaondétsetmó; penzentsero ndoñe chaondétsemna; y ndoñe chaondétseboše nÿe paselo becá crocénana jtsebomnama.

⁸ Pero chabe yebnentše posada entšanga júyentsamiama sempre chaotseprontana, tšabe soyènga chaotsebínÿnana sempre chaotsentšena, botamana juabnayá chaotsemna, ntšamo Bèngbe Bètsabe bominÿiñe tšabá yomncá chaotsiyena, nÿets tempo Bèngbe Bètsábioye chabotsadorana, y cachá nÿetsca soyènguine jenomándama chaotsobena.

⁹ Cha bontsemna nÿets tempo jtsošbuáchiyana y jtsobedecénana chë ndegombre buayenana soye, ntšamo tmojabuatëmbacá, chca, chë ndegombre buatëmbana soyéngaca ínÿenga añemo chaotsatšatnama, y chë soyama contra tmojtsemnènga jáyénjanama, ndoñe tšabá montsamama.

¹⁰ Cha chca bontsemna, banga nÿe ndëmandánènga jtsiyenama bošènga mondmèna causa, y chènga mondmèna, nÿe ndaye ndoservena soyèngama yapa oyebuambnayènga y ínÿenga áingñayènga, y chcanga más mondmèna chë nÿetsca ošbuáchiyènga base bobachtema chë más delicadentše tétšenènga jtsemnama yojtšamna ca mondbétsichamènguëntše. ¹¹ Y entseyta chéngbioye jtayáchetana, er chènga jamana ba pamíllanguëntše nÿetscanga Jesucristbeñe ošbuáchiyana chamotsajbanama. Chènga chca mondbétsama, chë ndoñe yontsamna jtsabuátambayama soyènga jtsabuátambayèše, nÿe paselo crocénana jongánama.

¹² Enjamna canÿa, ndabiama entšanga jtsichámuana cach Creta luarentša diosèngbiana

oyebuambnayá canjamna ca, y cha cachabe luarentša oyenèngbiana mèntšá tonjánayana: “Creta luarentše oyenènga, nÿets tempo bosterènga mondmèna, ainana ndbomnènga y oyènjayènga nÿe becá jasama bošènga ca.” ¹³ Y chca ndegombre cha tonjánayana; chíyeca chènga jabuache cochjucácana, chca, chènga Jesucristbeñe chamotsošbuáchema y chamotsobedecena chë buatëmbana soyènga, chë ndayiñe bènga mondošbuaché; ¹⁴ y cach judièngbe cuentènga ndoñe chamondétsuenana, ni chë ndegombre soyènga uabotenèngbe mandènga.

¹⁵ Chë ainaniñe bacna juabnènga ndbomnènga y chca juabnéngaca ndëmandánènga, nÿetsca soyèngama jtsejuabnayana mo ndegombre tšabe soyènga cuaftsemncá; pero chë bacna soyéngaca mandánènga y Jesucristbeñe ndošbuáchiyènga, nÿe ndayámnaca jtsejuabnayana mo bacna soye cuaftsemncá. Chca entsemna, er chéngbe juabnoca nÿe ena bacna soyènga jésebmanna, y ndaye bacna soye tmojama ora, chéngbe ainaniñe juabnènga ndoñe ntsebmanna, bacna soye tmojamama chaúyanama.

¹⁶ Chènga jtsichámuana Bèngbe Bètsá imuábuatma ca, pero ntšamo tmojtsama soyéngaca jtsinÿinÿnayana chca ndoñe ndegombre yondmènama. Chènga Bèngbe Bètsabe bominÿiñe puerte bacna entšanga mondmèna, y ntšamo cha tomandacá ndoñe ntsamana; chë causa chènga ndoñe ntsobenana ndaye tšabe soye jamama.

Soyènga ntšamo chë ndegombre buatëmbánana endmèncá

2 ¹ Ntšamo chacojtsoyebuambnacá sempre chaotsemna ntšamo chë ndegombre buatëmbánana endmèncá.

² Cochjayana chë bëtsëjëmëngna chamotsemna cachënga nÿetsca soyënguïñe jenomándama obenënga, nÿetscangbiama mo uámana entšangcá utabnënga, ntšamo jtsiyenama tšabá juabnayënga, nÿets tempo chë ndegombre soyënguïñe chamotsosbuaché, Bëngbe Bëtsá y nÿetscanga chamotsababuánÿeshana, y padecena soyënguïñe puerte uantadënga chamotsemna.

³ Cachcá, chë bëtsanana shembásënga chamotsiyena mo Bëngbe Bëtsábïoye adorayëngcá, uayátsenayënga ndoñe chamondëtsemna, ni tmoýënga. Entsamna chamotsiyena tšabe soyënga jtsamëse; ⁴ chë tobiasënga chamotsinÿanÿná y chamotsabuatambá ntšamo chëngbe boyanga y básënga jtsababuánÿeshanana, ⁵ ntšamo cachënga jenomándama jtsobenana, ainaniñe ndocna bacna soye ntsebomnana, yebnentša soyënga jtsamama jtsentsénana, nÿetscángaftaca tšábënga jtsemnana, cachëngbe boyángbïoye jtsayaunanana, chca, ndocná chaondëtsobena Bëngbe Bëtsabe palabrama bacá jatóyebuambnayana, ntšamo chë tobiasënga tmojamama.

⁶ Cachcá, chë bobontsënga añemo cochtsatšatnaye cachënga jenomándama chamotsobenama, ⁷ y chënga cochjñyanÿiye ntšamo yomna jtsiyenana, cach aca nÿetsca soyënguïñe tšabá jtsamëse. Chca chacojtsabuatambá ora, nÿe chë ndegombre buayanánana cochtsabuátambaye y corente respétoca chca cochtsama, ⁸ chë ndegombre soyënga jtsóyebuambnayëse; chca, ndocná chaondobená jayanana aca ndoñe tšabá tconjayana ca, y chca, chë acbe

contra ichámënga chamotséuatja, er ndocna bacna soye quemochatobenaye bëngbiama jayanama.

⁹ Chë nÿets tempo nÿe ínÿabïama oservénënga cochjábuaenaye, chëngbe nduiñëngbïoye chamotsobedecénama, soyënga chamotsama chënga chamotsóyejuama, y yajuatsanënga ndoñe chamondëtsemnana. ¹⁰ Ndoñe chamondëtsatbëbana, pero añe nÿetscañe tšabe palabra bomnënga chamotsemna. Chënga chca entsamna, chca, ínÿënga chámuinÿe y chamujuabó tša botamana chë buatëmbana soyënga, Bëngbe Bëtsá bëngbe Atsebacayabiama yomna ca.

¹¹ Er Bëngbe Bëtsá bënga šonjinÿanÿé cha bëngbe tšabiama juabnënga yobomnana, y chca, cha tojama nÿetsca entšanga chamotsobena atsebácanënga jtsemnana. ¹² Chë Bëngbe Bëtsabe juabna bëngbe tšabiama, šontsabuatambá jtsajbanama oyenana soyënga jtsamëse mo chë Bëngbe Bëtsá ndoñe mondadoranëngcá, quem luarentša bacna soyënga bošana jtsajbanama; y ntšamo mora quem luarentše jtsiyenámncá šontsabuatambá, cabënga jenomándama jtsobenëse, ntšamo Bëngbe Bëtsabe bominÿiñe tšabá yomncá y cha jadórama soyënga jtsamëse. ¹³ Y chca jtsamëse, y Bëngbe Bëtsábeñe ošbuachiyánaca jtsiyenëse, jtsobátmanana chë puerte oyejuayana jtsebomnana te, Bëngbe Bëtsá obená y Atsebacayá Jesucristo, buashinÿinÿaniñe y canÿe corente uamanacá yochjésabo ora. ¹⁴ Cha chabe derecho vida jtsobomñama cachcá tojanonÿá y bëngbiama tojanóbana, chë ntšamo Bëngbe Bëtsá bemandacá ndoñe yondmëncá jtsamëse oyenentšana bënga

játsebacama, ainaniñe ndocna bacna soye ndbomnënga jábiamama, bënga chábinga chamotsemnana, sempre prontánënga ntšamo tšabá yomncá jtsamama.

¹⁵ Chca cmontsemna jtsabuátambayana, chënga beca añemo jtsatšatnayëse, y jtsinñanñayëse chënga bacna soye tmojamama, chë nyets condbomna mándoca jucacánëse. Ndoñe catjaleséncia ndocná chaundayana aca mando ndoñe condbomna ca.

**Ndayá Jesucristbeñe ošbuáchiyënga
yojtsamna jamana**

3 ¹ Cochtsama chënga chamuatenójuaboma chë mandadënga y inye mándayënga chamotsayaunanama, chamotsobedecénama, y tšabá yomncá jamama siempre chamotseprontánama. ² Ndocnabiama ndocna bacna soye chamondëtsoyebuambná, penzentserënga ndoñe chamondëtsemna, ndayá nyëtscángaftaca natjëmbana jtsiyenama bošënga, tšabá mándbomnënga, nyëtscanga tšabe ainánaca imojtsénñyama entšanga jtsinñanñayëse.

³ Er bëngnaca tempo monjamna Bëngbe Bëtsabe soyëngama ndosertánënga, ntšamo Bëngbe Bëtsá endëmandacá ndoñe quemjátanama, ingñëñënga y mandánënga monjamna nyëtsca bacna soyënga jamama juabnéngaca y nye quem luarentše tšabá jtsemnana juabnéngaca. Bënga monjaniyena nye bacna soyënguiñe juabnaye, inyënga uantšaboše. Inyënga bënga šonjanébuayënja y bënga nyëtscanga monjanenáboyënja. ⁴ Pero Bëngbe Bëtsá, bëngbe Atsebacayá, bëngbe

tšabiama juabna yobómnyeyca y tša šuababuánñeshanama šonjaninñanyé ora, ⁵ cha šonjanatsebacá, pero ndoñe nderado bënga ndaye tšabe soye tmojanmama, ndayá cha bëngbiama tbojanongméyeca. Cha šonjanatsebacá, bëngbe bacna soyënga jabuajuánase, y chë Uámana Espiritu jujabuáchëse, bënga mo tsmëma entšangcá chamotsemnana, ntšamo tempo yojamncá ntjatsjuabnacyá y ntjatamcá. ⁶ Bëngbe Atsebacayá Jesucristbeyeca, Bëngbe Bëtsá tojanma Uámana Espiritu bëngbe ainaniñe nyets tempo chaotsemándama y bënga chašotséjabuachanama, ⁷ chca bënga, Bëngbe Bëtsá bacna soyëngama šojaperdónanga y bëngbe tšabiama juabna bómnyeyca tojayana chabe bominñiñe tšábënga imomnënga, chamotsobena cha yobomna soyënguentshana bënga mo ndayá cuaftsëtocancá jóyëngacñama, y chca, chábeñe jtsošbuáchiyëse, chë nyëtsca tescama yomna tšabe vida chamotsobátmanama.

⁸ Chca, lempé ntšamo tijayancá nyä ndegombre endmëna, y atše séntseboše chë soyëngama bëtscá chacotsabuatambá, chca, chë Bëngbe Bëtsábeñe tmošbuachenga chamotsentsëna chë tšabe soyënga jtsamama. Chë buatëmbánana puerte tšabá endmëna y nyëtscangbiama bëtscá endoservena. ⁹ Inyënga nye ndoservena soyëngama jabuachana tmojtsenatsëtsná ora, y anteungbe cuentëngama chamojtsoyebuambná ora, ndoñe cattsonremetena; ndoñe cattsama cach tšëngaftanga ndoñe tšabá jtsenëyeunanamcá, y judiëngbe leyëngama ndoñe inyëngaftaca cattsenpéliaye. Chca jtsamana tundayama ntososervénana, y nye bonamente chca jtsamana.

¹⁰Nderado nda tojtsama entšanga ndoñe cachá nyetscanga chamondétsejuabnama y chamotsenpéliama, canye o uta soye cochjabuayená ndoñe tšabá tonjamama; pero cha ndoñe tcmónjýeunase, chentšana cháftaca ndoñe más cattsóyebuambnaye. ¹¹Chca cochjama, er aca cochanjátatsšëmbona canya chca tojtsemná, chabe juabna tojatrocá bacna soyënga jtsejuabnayama. Chë soye y chë inye bacna soyënga ntšamo cha tojtsamcá, jtsinyanynayana cha ibojtsemna castiganá chama jtsemnama.

Inye soyënga Titbiamama

¹²Atše, Artemas o Tíquico ácbioye chaijichmó y choca chaojáshjango ora, ndayánaca cochjama Nicópolis puebloye aca jama atše jinýama, er atše sënjuabó chentše chë uaftenëntscuana jëftsemnana.

¹³Lempe ntšamo chacojobenacá,

cochjuájabuache chë ínýenga obuauyayá Zenas, y Apólosnaca; lempe ntšamo chata ibojtsëjbotcá cochjátšataye, ínýoye jama jatóntsama chamobenama y benachëjana tondaye chaondëtsabuáshebenama. ¹⁴Atše séntseboše, bëngbe entšanga, chë bëngcá Jesucristbeñe ošbuáchiyënga, chamotsentšena chë tšabe soyënga jtsamama y chë puerte ujabótënga jtsëjabuáchanama, chca, chënga tondayama ndoservena vidënga ndoñe chamondétsebomnama.

Pablo Títbioye jadiósoftanama

¹⁵Nyetscanga chë átšeftaca montsemnéngnaca cmontsechuaná. Atšbe cuenta cochjácheuaye nyetscanga chë bënga imuababuanýeshanëngbioye, cach bëngcá Jesucristbeñe ošbuáchiyana bómnyeca. Atše, Bëngbe Bëtsá séntseimpadana, cha chaoma ácbëñe tšabe bendicionënga chaotsemnama.